

A nombra James Fazio como CEO Interino di Aruba Airport Authority N.V.

Aruba Airport Authority N.V. (AAA), administrado y operado di Aeropuerto Internacional Reina Beatrix, ta contento di anuncia e nombracion di James Fazio como Hefe Ejecutivo Interino, entrante 1 di augustus 2025.

E transicion di liderazgo aki ta bin despues di e conclusion exitoso di e mandato di e Team di Maneho Interino, cu a guia e organisacion durante e ultimo 12 lunanan pa medio di un realineacion strategico, operacionnan continuo y tambe transicion gradual di tur e aerolineanan cu destinacion pa Merca pa e terminal nobo di check-in y tumando den uso e sistema nobo di maneho di maleta completamente automatiza, aumento di cantidad di pasahero y e retonan operacional. E decision pa nombra un CEO Interino ta garantisa e enfoca continuo riba excelencia operacional, sostenibilidad y prioridadnan strategico, mientras ta tuma e pasonan final pa formalisa un



Strategic Cooperation Agreement (SCA) entre Gobierno di Aruba, AAA y Royal Schiphol Group (RSG). Den e rol aki, James Fazio lo zorg pa nos capitalisa riba su experticio pa sostene excelencia operacional mientras su liderazgo ta facilita e periodo critico aki y ta pone e base pa e CEO permanente por asumi responsabilidad sin problema bou di e acuerdo binidero.

James Fazio ta un checutivo di aeropuerto cu experiencia

amplio den liderazgo, anteriormente el a fungi como CEO di Aruba Airport Authority N.V. di aña 2013 te cu aña 2019. Su bishita recien na nos isla den luna di juni 2025 a reafirma su familiaridad cu e operacionnan y vision strategico di Aeropuerto di Aruba, esaki ta pone cu e ta bon posiciona pa guia e organisacion durante e fase di transicion aki.

“Nos ta sigur cu James Fazio su conocimiento profundo di Aeropuerto di Aruba y su liderazgo demuestra lo provee continuidad fuerte segun cu nos ta move den e transicion nobo importante aki”, asina Marion Kan, Presidente Hunta di Directornan di Supervision (BOSD) di AAA a bisa. El a continua bisando cu: “Su regreso ta reenforza nos compromiso continuo cu estabilidad, seguridad y progreso a largo plaso, mientras nos ta atende cu e retonan ocasional cu por surgi cu e ekiponan nobo y procesonan den un aeropuerto cu capaci-



dad limita.”

E nombramento interino di James Fazio ta parti di e acuerdo cu Royal Schiphol Group, e partner strategico di hopi tempo di AAA, cu ta provee e funcion di CEO bou di e terminonan di e SCA. Su rol lo enfoca riba mantencion di estabilidad den operacionnan diario, sostene cumplimiento cu regulacion prome cu e audit di DCCA y garantisa implementacion correcto di iniciativanan clave, manera planificacion y ehecutacion di mantencion, manera Fase 1B

y e aceleracion di e fasenan 2 y 3 di e proyecto di expansion di terminal di Gateway 2030.

Hunta di Supervision, accionistanan di AAA y RSG ta gradici e Team di Maneho Interino; Aisha Anthony, Jurgen Benschop y Barbara Brown, pa nan liderazgo, compromiso y dedicacion incansabel durante e aña cu a pasa. A pesar di enfrente varios reto, nan guia constante a garantisa e continuidad di negoshi, progreso y resiliencia durante un periodo di transicion critico pa AAA.

Segun minister Geoffrey Wever

Demanda record pa bono di Aruba di 165 miyon ta confirma confiansa den economia di Aruba

Gobierno di Aruba, pa medio di Minister di Finanzas, Asunto Economico y Sector Primario, Geoffrey Wever, ta anuncia cu e emision reciente di dos bono local a resulta den un exito rotundo, demostrando un confiansa fuerte di mercado local den maneho financiero di pais.

Den e proximo tres luna Aruba mester paga bek casi 165 miyon na debenan cual mayoria ta debenan cu ta mas di 10 aña bieu. Pa por paga esaki gobierno a emiti dos bono. Mientras gobierno a busca 165 miyon florin den mercado local, e mercado mes a pone 380 miyon florin disponibel. E oferta ta casi 2.3 biaha mas grandi cu e necesidad. Ambos a bay na un interes competitivo, di 5 te cu 6%. Esaki ta confirma confiansa den finanzas y economia di nos isla.

“Esaki ta muestra claramente cu e mercado, tanto local como internacional, ta tene Aruba na un nivel halto di



confiansa,” segun Minister Geoffrey Wever.

E gran demanda a resulta den un interes atractivo cu ta refleha den un agio di casi 10 miyon florin, un beneficio directamente pa e fondo publico. Casi mitar di esaki lo wordo usa pa inversion pa sigui stimula economia y e otro mitar lo bay pa sigui baha debe.

Aunke ta trata di un prestamo

nobo, Minister Wever a splica cu esaki no ta debe nobo y no lo aumenta e debe nacional di Aruba. E fondonan ta bay completamente na paga riba debe bieu, mayoria emiti prome cu COVID. Pa 2025, Aruba mester paga 534 miyon florin riba 16 prestamo. Pa cubri e suma aki, Parlamento a autorisa minister di finanzas pa refinanciamiento di 456 miyon florin, pero danki na

e agio logra, Gobierno lo usa solamente 451 miyon florin.

Debe ta na su punto mas abou den añanan

E nivel di debe, cu a yega su punto mas halto na 127% di GDP durante COVID, pero esaki a wordo baha rapidamente pa 70% den prome kwartaal di 2025. E debe di awe ta na un nivel comparable cu 2013.

Confiansa base riba resultado

Diferente factor importante a contribui pa nos a yega na e nivel di confiansa aki, entre otro, Aruba tin un historia di pago na tempo y completo; tin un compromiso real pa estabilisa y baha debe; nos a demostra resiliencia economico durante pandemia; nos a sa di mantene tres investment grade ratings den ultimo añanan.

Financiamiento internacional y dialogo cu Hulanda

Aruba ta prepara pa emiti bono internacional den e proximo lunanan pa asina cubri e resto di financiamiento. Un proposicion lo wordo presenta na Rijksministerraad pa un prestamo di maximo USD 150 miyon. Mientras tanto, Aruba ta sigui cu dialogo cu Hulanda pa financiamiento adicional pa sigui garantisa cumplimiento cu nos inversionistanan pero alabes reduci gasto di interes y crea espacio pa por sigui paga debe mas rapido.